

Umsögn

26. maí 2021

Atvinnuvega- og nýsköpunarráðuneytið

Umsögn send í samráðsgátt



Efni: Umsögn Landgræðslunnar um Ræktum Ísland!, umræðuskjal verkefnisstjórnar um landbúnaðarstefnu fyrir Ísland

Landgræðslan starfar á grundvelli laga nr. 155/2018 en markmið þeirra laga er skv. 1. gr. að vernda, endurheimta og bæta þær auðlindir þjóðarinnar sem fólgnar eru í gróðri og jarðvegi og tryggja sjálfbæra nýtingu lands. Ennfremur ber að vinna að því að nýting taki mið af ástandi lands, stöðva eyðingu og komast hjá spjöllum á gróðri og jarðvegi, auka kolefnisbindingu, byggja upp, endurheimta og auka viðnámsþrótt og þanþol vistkerfa gagnvart áföllum og náttúruvá o.fl.

Landgræðslan hefur kynnt sér skýrsluna Ræktum Ísland! og þá stefnumörkun um landbúnað sem þar er lýst. Byggir umsögn stofnunarinnar á ofangreindum lögum, einkum ákvæðum er lýta að því að vernda, endurheimta og bæta þær auðlindir þjóðarinnar sem fólgnar eru í gróðri og jarðvegi og tryggja sjálfbæra nýtingu lands.

Landgræðslan gerir ekki athugasemdir við einstaka þætti skýrslunnar og telur að fjallað sé um öll meginatriði á fullnægjandi hátt. Stofnunin telur að mikil tækifæri fyrir íslenskan landbúnað liggja í endurheimt vistkerfa, umbreytingu auðna og raskaðs lands í nytjaland og sjálfbærri landnýtingu. Ávinningur sem felst í sjálfbærri nýtingu og endurheimt vistkerfa er fjölpættur, svo sem bætt ástand lands og þar með auknir möguleikar til nýtingar, bætt vatnsmiðlun, aukið viðnám gegn náttúruvá og binding kolefnis úr andrúmslofti.

Brýnt er að styðja áfram við verkefnið Gróllind, enda upplýsingar um landnýtingu og ástand lands lykilatriði við ákvarðanatöku. Þá er mikilvægt að huga einnig að upplýsingum um landnýtingu t.d. girðinga og legu þeirra og koma þeim í það form að þeim sé safnað saman, uppfærðar og gerðar aðgengilegar hagsmunaaðilum.


Landgræðslan fagnar umfjöllun um verkefnið Loftslagsvænni landbúnað og telur að sóknarfæri fyrir landbúnaðinn séu til staðar með eflingu þess.

Að auki mætti nefna að um þessar mundir standa yfir umfangsmiklar rannsóknir þar sem kannaðir eru möguleikar á því að bæta næringarefnum í lífrænan úrgang til að gera hann verðmætari sem áburð. Niðurstöður þessara rannsókna ættu m.a. að gera uppgræðslu og ræktun með lífrænum efnum markvissari og hagkvæmari.

Landgræðslan gerir ekki frekari athugasemdir við skýrsluna en er reiðubúin til að veita frekari upplýsingar og ráðgjöf um þá þætti er að verksviði hennar snúa, um jarðvegs- og gróðurvernd, uppgræðslu, vernd og endurheimt votlendis, varnir gegn landbroti og sjálfbæra nýtingu lands, sé þess óskað.

Virðingafyllst

f.h. Landgræðslunnar



Gústav M. Ásbjörnsson